

Manuel da Silva tambe ta un “Trupial”



Durante un celebracion di carnaval.

ORANJESTAD – “De Trupialen” ta un grupo cu a forma hopi di nos ciudadanonan den lidernan di awe y tambe cantantenan cu a sa di destaca durante hopi aña. Un di nan ta e conocido Manuel da Silva, miho conoci como Manuelito di Manuelito’s Sports Bar, comentarista di deporte di Drag Race como tambe presentado di deporte den Telenoticia na Telearuba.

Den su propio palabra nan el a sa di relata su experiencia den “De Trupialen”.

“Den mi hubentud mi tabata “timido”, mi tata a dicidi di hacimi misdienaar na misa di playa y na kapel di Hospital San Pedro, y ora mi tata a tende “De Trupialen” ta canta coro den misa di playa el a acerca Frère Alessius y e siguiente diamars mi a bay practica canto den club di



Durante presentacion di deporte na Telearuba.



Den coro.

“De Trupialen”.

Esaki tabata na aña 1965 pa 1966, y a tumami 6 luna di training den e grupo aspirant-junioren pa mi por a bira un “Junioren”.

Despues di hopi tempo y practica porfin na aña 1966 mi a wordo instala oficialmente como un Trupial den Cas di Cultura.

Y di eynan e parti dushi a cuminsa: canta den coro na misa, training pa comedia, y ora e comedia tawata cla, nos tabata presenta e comedia den tur bario di Aruba.

Locual tabata hopi agradabel tabata di por a pasa bishita scolnan y siña nan con pa canta den coro na misa, y corda cu e tempo ey mucha homber nan tawata bay school apart di mucha muhe nan, pero “De Trupialen” tawata permiti pa drenta meisjes school pa duna les di canto, ta artista grandi nos tawata mei mei di tur e mucha muhe nan.

Naturalmente e trabou aki tabatin su pago, esun cu haci su best henter luna, diasabra frèrè Alessius tawata hiba nos lama den su bus di palo cu su 2 botonan di rubber y e mes ta sinta bou su paraplu y sinta wak nos gosa di un dushi dia na lama, pero si e ripara cu tin pleitamento pa un di e botonan di rubber, e tawata bolter e boto di rubber boca abou y pleito a caba.

Den grupo di “ junioren”



Manuel da Silva cantando.

frèrenan tabata dicidi tur cos pero pa tempo mi a bira 14 aña nan a pasami pa aspirant senioren. Aki bo ta siña organisa y domina diferente disciplina entre otro prepara y entrena comedia y musica, cu ta encera participa den reunionnan caminda cu bo ta duna bo opinion. Den otro palabra siña organisa actividadnan y asina poco poco bira un lider. Tur esaki naturalmente bou di supervision di frèrè nan. Den “De Trupialen” mi a cera conoci cu hopi amigo y amiganan cu te e dia di awe nos a keda bon amigo.

Danki na “De Trupialen” mi a siña expresa mi mes via canto, comedia pero tambe den reunionnan mi a siña organisa actividadnan. Danki na mi mayorman y na “De Trupialen” mi a haya e disciplina pa ta ken mi ta awe.

P’esey awe mi por bisa cu orguyo, ami ta un Trupial!” □